

tor nostro, missier Theodoro Triulzi, era a Lodi con le zente, e lui sier Andrea Griti veria a Cassan. Et scrive esser zonti 3000 valesani di qua da' monti a Novara, quali venivano di longo. *Item*, di 2000 lanzinech erano in Brexa, il Gran contestabile è contento tuorli per il Christianissimo re; sichè francesi fanno grandissima spesa, non sparagnando danari. *Item*, mandano una *letera intercepta dil signor Marco Antonio Colona capitano zeneral cesareo, data a Lodi, a di 24, scrive a l'Imperador*, la copia sarà qui avanti. Come è zonti pochi danari, *solum* 32 milia raynes, e questo è niente a tanti li bisogna; e se non si prevede presto di danari, sguizari si leverano e vede l'impresa persa, perchè sguizari dieno aver assa' danari e sono insolenti, e si voleno partir; sichè li danari ha portato il cardinal Sedunense non è bastanti a gran zonta. Et avisa li 2000 lanzinech ussiti di Brexa per non esser pagati, e tien si acorderà con li so' inimiei, e cussi alcuni spagnoli, et anderano con le gente di la Signoria è ad Axola, e potranno far etc.

110 *Di Vicenza, di sier Nicolò Pasqualigo podestà et capitano, di eri.* Replica come l'Imperador zonse a Trento Domenega passata, et poi il Mercore, a di 30, parti de Trento per andar a Riva per dar favor a le sue zente e sguizari; e altre particolarità, *ut in litteris*.

Di Padoa, di sier Piero Querini podestà, sier Hironimo da cha' da Pexaro capitano, et sier Zuan Paulo Gradenigo provedador zeneral, di eri. Come achadete certo disordine, che havendo voluto un fante brisigello meter a sacho certa corba di ceriege, et di hordine di lui capitano fatto prender, volendo farli dar corda in Piazza, fo tolto da le man da essi fanti brisigelli, quali si messeno in ordinanza, nè valse a lui capitano che andò li per averlo, che quasi non fu ferito, et cussi in ordinanza andono sul Pra' di la Valle; sichè ditti brisigelli fano gran danni; et narano come segui il fatto.

Et inteso questo, il Colegio li balotono una paga: sono numero 500.

Da poi disnar, fo Pregadi et leto le letere exceto questa di Padoa.

Fu posto la commission di sier Lunardo Bembo, va baylo a Constantinopoli con una nave, parti a di 5 di questo, *pro forma*, et fo mandato li presenti soliti portar i bayli al Signor e li bassà e altri.

Fo leto una letera scritta per il Consejo di X con la zonta a di . . . , a l'orator nostro in Ingaltera, e una a l'orator in Franza, e una a l'orator nostro in Milano.

Et nota. In le letere dil Griti è uno aviso, che l'orator anglico, era in campo de i nimiei, disse a uno parleria volentiera con missier Andrea Griti per cosse che sarà utile al Stado di la Signoria.

Fu posto, per li Savii, atento la egritudine di sier Lunardo Emo luogotenente in la Patria di Friul, si come questo Consejo ha inteso, sia eleto *de præsenti* uno vicelocotenente e provedador zeneral di la Patria di Friul con ducati 60 al mexe neti per spexe, non sii obligato monstrar alcun conto, meni con si tre famegii et tre cavali, debbi partir fra termine di zorni 8, *ut in parte*. Ave 90 di si, 80 di no, e fu presa. Et quelli non la volseno, fu perchè voleno sier Giacomo Corner, eleto luogotenente in so loco zà molti mexi, et doveria esser andato, andar debbi et non dar spesa a la Signoria al presente; pur fu presa.

Scurtinio di Vicelocotenente e provedador in la Patria di Friul, con ducati 60 al mese. 110*

Sier Alvise Bembo, fo provedador di stratioti, qu. sier Polo, da San Zulian	43.110
Sier Andrea Contarini, fo provedador a Pordenon, qu. sier Marco, qu. sier Andrea procurator	33.112
R † Sier Zustinian Morexini, fo savio a terra ferma, qu. sier Marco . . .	95. 54
Sier Daniel Dandolo, fo provedador a Salò, qu. sier Hironimo	85. 68
Sier Zuan Dolfin, fo provedador a Feltre, qu. sier Hironimo	29.124
Sier Vicenzo Valier, fo di la zonta, qu. sier Piero	79. 77
Sier Alvise Zorzi, fo di la zonta, qu. sier Antonio el cavalier	58. 99
Sier Anzolo Malipiero, fo capitano a Vicenza, qu. sier Tomaxo	42.112
Sier Bernardin Contarini, fo conte a Traù, qu. sier Zuan Matio	45.105
Sier Zuan Moro, fo provedador sora le camere, qu. sier Antonio . . .	54.100
Sier Bortolo da Mosto, fo savio a terra ferma, qu. sier Giacomo . . .	94. 65
Sier Marco Marcello, fo provedador in Friul, qu. sier Giacomo Antonio el cavalier	23.133
Sier Zusto Guoro, è di Pregadi, qu. sier Pandolfo	37.123